

七十二家集

顏光祿集引

顏延年自謂狂不可及然觀其戒子峻曰平生不喜見要人不幸見爾規峻治第曰好為之勿令後人笑拙則故非善狂者至庭誥一篇不惟不

狂且具有垓宇坊表矣五君
咏斥去山王非必用五君自
倣殆不喜要人意也何偃呼
公而不受慧琳登座而變色
亦曰是要人耳其在潯陽締
歡陶居士則幽人者要人之

反也古謂顏詩如鋪錦列繡
雕績滿眼然陶鑄之極別有
寫生手殆未易言者他文章
謝康樂不入梁選而延年赭
白馬賦上巳詩序元后哀策
陽陶二誄及祭屈子文正如

千尺珊瑚片，在鐵網中。

崇禎辛未花朝前二日召隱
主人張爕書于清音亭子



顏光祿集目錄

卷之一

賦

赭白馬賦

白鸚鵡賦

寒蟬賦

又

行殯賦

樂府

宋南郊登歌三首

夕牲歌

迎送神歌

饗神歌

從軍行

秋胡行

九章

輓歌

詩

應詔讌曲水作詩

八章

皇太子釋奠會作

九章

三月三日詔宴西池詩

爲皇太子侍宴餞衡陽南平二王應詔
詩

應詔觀北湖田收

車駕幸京口侍遊蒜山作

車駕幸京口三月三日侍遊曲阿後湖
作

拜陵廟作

贈王太常

王僧達荅顏延年附

夏夜呈從兄散騎車長沙

直東宮荅鄭尙書

和謝監靈運

謝靈運還舊園見顏范二中書附

北使洛

還至梁城作

始安郡還都與張湘州登巴陵城樓作

五君詠五首

阮步兵

稽中散

劉參軍

阮始平

向常侍

爲織女贈牽牛

歸鴻

除弟服

辭難潮溝

侍東耕詩

發景陽樓

卷之二

詔

追贈袁淑詔

表

謝子竣封建城侯表

自陳表

請立渾天儀表

爲齊竟陵王世子臨會稽表

拜永嘉太守辭東宮表

書

釋何衡陽達性論書

何承天荅顏永嘉附

重釋何衡陽書

何承天重荅顏永嘉附

卷之三

書

又釋何衡陽書

何承天達性論附

與王微書

王微畫序附

吊張茂度書

與王曇首書

序

三月三日曲水詩序

卷之四

七

七繹

文

庭誥文

又

頌

碧芙蓉頌

赤槿頌

贊

蜀葵贊

新喻侯茅齋贊

箴

大筮箴

連珠

範連珠

卷之五

謚議

宋武帝謚議

哀策文

宋文帝元后哀策文

誄

陶徵士誄

陽給事誄

祭文

爲湘州祭虞舜文

爲湘州祭屈原文

祭俞文

銘

家傳銘

狀

天馬狀

附錄

顏延之傳

沈約

顏延之傳

李延壽

與顏延之書

何尚之

祭顏光祿文

王僧達

遺事

集評

顏光祿集卷之一

宋琅邪顏延之延年著

明閩漳張燮紹和纂

賦

赭白馬賦

雖不稱力馬以龍名豈不以國尚威容軍駉趨
迅而已實有騰光吐圖疇德瑞聖之符焉是以
語崇其靈世榮其至我高祖之造宋也五方率
職四隩入貢秘寶盈於玉府文駟列乎華廐乃

有乘輿赭白特稟逸異之姿妙簡帝心用錫聖
阜服御順志馳驟合度齒歷雖衰而藝美不忒
襲養兼年恩隱周渥歲老氣殫斃于內棧少盡
其力有惻上仁乃詔陪侍奉述巾青末臣庸蔽
敢同獻賦其辭曰

維宋二十有二載盛烈光乎重葉武義粵其肅
陳文教迄已優洽泰階之平可升興王之軌可
接訪國美於舊史考方載於往牒昔帝軒陟位
飛黃服皂后唐膺籙赤文候日漢道亨而天驥

呈才魏德懋而澤焉效質伊逸倫之妙足自前
代而間出並榮光於瑞典登郊歌乎司律所以
崇衛威神扶護警蹕是川精曜叶從靈物咸秩
暨明命之初基聲九區而率順有肆險以稟朔
或踰遠而納賁聞王會之阜昌知函夏之克軌
總六服以收賢掩七戎而得駿蓋乘風之淑類
實先景之洪胤故能代驂象輿歷配鈎陳齒筭
延長聲價隆振信聖祖之蕃錫留皇情而驟進
徒觀其附筋樹骨垂梢植髮雙瞳夾鏡兩權協

月異體峰生殊相逸發超攄絕大塵轍驅驚迅
於滅沒簡偉塞門獻狀絳闕且刷幽燕畫秣荆
越教敬不易之典訓人必書之舉惟帝惟祖爰
游爰豫飛輜軒以戒道環轂騎而清路勒五營
使按部聲八鑾以節步具服金組兼飾丹牂寶
鉸星纏縷章霞布進迫遮列却扇輦輅欵聳擢
以鴻驚時濩略而龍馭弭雄姿以奉引婉柔心
而待御至於露滋月肅霜戾秋登王于興言闡
肄威稜臨廣望坐百層料武藝品驍騰流藻周

施和鈴重設睨影高鳴將超中折分馳迴場角
壯永埒別輩越群絢練負絕捷趨夫之敏手促
華鼓之繁節經玄蹄而電散歷素支而冰裂膺
門沫赭汗溝走血跪迹迴唐畜怒未洩乾心降
而微怡都人仰而朋悅妍變之態旣畢凌遽之
氣方屬跼鑣轡之牽制隘通都之圈束脊四極
而驤首望朔雲而蹠足將使紫鷲駢衡綠虵衛
轂纖驪接趾秀騏齊于覲王母於崑墟要帝臺
於宣嶽跨中州之轍迹窮神行之軌躅然而盤

于遊畋作鏡前王肆於人上取悔義方天子乃
輟駕廻慮息徒解裝鑒武穆憲文光振民隱脩
國章戒出豕之敗御惕飛鳥之跼衡故祇慎乎
所常忽敬備乎所未防輿有重輪之安馬無泛
駕之佚處以濯龍之輿委以紅粟之秩服養知
仁從老得卒加弊帷收什質天情周皇恩畢
亂曰惟德動天神物儀兮於時駟駿克階街兮
稟靈月駟祖雲螭兮雄志倜儻精權奇兮旣剛
且淑服韉羈兮効足中黃狗驅馳兮願終惠養

蔭本枝今竟先朝露長委離兮

白鸚鵡賦

余具職崇賢預觀神秘有白鸚鵡焉被素履玄
性溫言達九譯絕區作玩天府同事多士咸奇
思賦其辭曰

稟儀素域繼體寒門貌履玄而被潔性既養而
亦溫雖言禽之末品妙六氣而尅生徃秘奇於
鬼服來克美於繁京恨儀鳳之無辨惜晨鷺之
徒暄思受命於黃髮獨含辭而採言起交河之
榮薄出天山之無垠既達美於天居亦儷景於

雲阿漸惠和之方渥綴風土而未訛服璫翮於
短衿仰梢雲之曾柯覩天網之一布漏微翰於
山阿

寒蟬賦

始蕭瑟以攢吟終媚媚而孤別越客發度漳之
歌代馬懷首燕之信不假蕤於范冠豈鏤體於
人爵折清飈而不淪團高木以飄落

又

食霞之氣神馭乎九仙稟露之清氣精於八蟬

行殯驅

嗟我來之云遠觀行殯於水隅崩朽棺以掩壙
仰枯顙而枕衢資沙礫以含實藉水草之樾儲
撫躬中塗太息蘭渚行徘徊於永路時悄愴於
川侶

樂府

宋南郊登歌三首

宋書樂志曰元嘉二十二年詔顏延之造天地郊夕牲迎送神饗神雅樂登歌

三篇

夕牲歌

寅威寶命嚴恭帝祖表海炳岱

選作炳海表岱

系唐胄

楚靈鑒濟

選作膚

文民屬睿武奄受敷錫宅中拓

宇亘地稱皇罄天作主月竈來賓日際奉土開

元正首禮交樂舉六典聯事九官列序有牲在

滌有絜在俎以薦王衷以荅神祐

迎送神歌

維聖饗帝維孝饗親皇乎備矣有事上春禮行
宗祀敬達郊禋金枝中樹廣樂四陳陟配在京
降德在民奔精照夜高燎煬晨陰明浮爍沈滢
音深淪告成大報受釐元神月御按節星驅扶
輪遙興遠駕曜曜振振

饗神歌

營泰時定天衷思心睿謀筮從建表蒔設郊壇

田燭置燿火通曆元旬律首吉飾紫壇坎列室
巾星兆六宗秩乾宇晏地區謚大孝昭祭禮供
牲日展盛自躬具陳器備禮容形僊綴被歌鍾
望帝閭聳神蹕靈之來辰光溢潔粢酌娛太一
明輝夜華哲日裸旣始獻又終煙薌鬯報清穹
饗宋德祚王功休命永福履充

從軍行

以下
五言

苦哉遠征人畢力幹時艱秦初畧揚越漢世爭
陰山地廣旁無界岳阿上虧天嶠霧下高鳥泳

沙固流川秋飈冬未至春液夏不涓閩峰指荆
吳胡埃屬幽燕橫海咸飛颺絕漠皆控弦馳檄
發章表軍書交塞邊接鏑赴陣首卷甲起行前
羽驛馳無絕旌旗晝夜懸臥伺金折響起候亭
燧煙遯矣遠征人情哉私自憐

秋胡行

九章

檣梧偃高鳳寒谷待鳴律影響豈不懷自遠每
相匹婉彼幽閒女作嬪君子室峻節貫秋霜明
艷侔朝日嘉運旣我從欣願自此畢

燕居未及好

五臣作歡

良人顧有違脫巾千里外結

綬登王畿戒徒在昧旦左右來相依驅車出郊

郭行路正感遲存爲久離別沒爲長不歸

嗟余怨行役三陟窮晨暮嚴駕越風寒解鞍犯

霜露原隰多悲涼迴颼卷高樹離獸起荒蹊驚

鳥縱橫去悲哉遊宦子勞此山川路

超搖行人遠宛轉年運徂良時

五臣作人

爲此別日

月方向除孰知寒暑積僂俛見榮枯歲暮臨空

房涼風起坐隅寢興日已寒白露生庭蕪

勤役從歸願反路遶山河昔辭秋未素今也歲

載華蠶月歡

一作觀

時暇桑野多經過佳人從所

務窈窕援高柯傾城誰不顧弭節停中阿

年徃誠思勞路遠濶音形雖爲五載別相與味
平生捨車遵徃路鳬藻馳目成南金豈不重聊
自意所輕義心多苦調密比金玉聲

高節難久淹竭來空復辭遲遲前途盡依依造

門基上堂拜嘉慶入室問何之日暮行來

選作采

歸物色桑榆時美人望昏至慙歎前相持

有懷誰能已聊用申苦難

補註作艱

離居殊年載一

別阻河關春來無時豫秋至恒早寒明發動愁
心閨中起長歎慘悽歲方晏日落遊子顏

高張生絕弦聲急由調起自昔枉光塵結言固

終始如何久爲別百行誓

善作愆

諸已君子失明

義誰與偕沒齒愧彼行露詩甘之長川汜

挽歌

令龜啓明兆撒奠在方昏戒徒赴幽冥祖駕出
高門行行去城邑遙遙守丘園息鑣竟平塋稅

鶴別巖根

詩

應詔讌曲水作詩

八章○以下四言

宋畧曰元嘉十一年二月禊飲于樂遊苑祖道江夏王義恭衡陽王義季有詔

會詩

道隱未形治彰既亂帝迹懸衡皇流共貫惟王
創物永錫洪筭仁固開周義高登漢

祚融世哲業究列聖太上正位天臨海鏡制以
化裁樹之形性惠浚萌生信及翔泳

崇虛非徵積實莫尚豈伊人和寔靈所貺日完

其朔月不掩望航琛越水輦翬踰嶂

帝體麗明儀辰作貳君彼東朝金昭玉粹德有
潤身禮不愆器桑中淵映芳猷蘭秘

昔在文昭今惟武穆於赫王宰方旦居叔有睟
叔蕃爰履奠牧寧極和鈞屏京維服

朏魄雙交月氣參變開榮灑澤舒虹爍電化際
無間皇情爰眷伊思鎬飲每惟洛宴

郊餞有壇君舉有禮幙帷蘭甸畫流高陞分庭
薦樂折波浮醴豫同夏諺事兼出濟

仰闕豐施降惟微物三妨儲隸五塵朝黻途泰
命屯恩克報屈有悔可悛滯取難拂

皇太子釋奠會作

九章

宋恭帝元嘉二十年三月
皇太子劬釋奠于國學

國尚帥位家崇儒門稟道毓德講藝立言浚明
災曙達義茲昏永瞻先覺顧惟後昆

大人長物繼天接聖時屯必亨運蒙則正偃閉
武術闡揚文令庶士傾風萬流仰鏡

虞庠飾館睿圖炳晬懷仁憬集抱智膺至踵門

陳書躡屩獻器澡身玄淵宅心道秘

伊昔周儲聿允徃記思皇世哲體元作嗣資此

夙知降從經

一作繼

志邊彼前文規周矩值

正殿虛筵司分簡日尙席函丈永疑奉帙侍言

稱辭惇史秉筆妙識幾微王載有述

肆

五臣作肆

議芳訊大教克明敬躬祀典告奠聖靈

禮屬觀盥樂薦歌笙昭事是肅俎實非馨

獻終襲吉卽宮廣讌堂設象筵庭宿金懸台保

兼徽皇戚比彥肴乾酒澄端服整弁

六宮視命九賓相儀纓笏市序巾卷克街都莊
雲動野燄風馳倫周伍漢超哉邈倚
清暉在天容光必照物任其情理宣其奧妄先
國胄側聞邦教徒愧微冥終謝智效

三月三日詔宴西池詩

河嶽曜圖聖時利見於赫有皇升中納禪載貞
其恒載通其變大哉人文至矣天睠昭哉儲德
靈慶攸繁明兩紫宸景物乾元帝宗菴藹惟城
惟蕃袞衣善職彤弓受言飾館春宮稅鑣青輅

長筵逶迤浮觴汭泝

爲皇太子侍宴餞衡陽南平二王應詔詩
大儀在御皇聖居貞旁緝民紀仰緯天經物資
感變神以瑞形川無遁寶山不闕靈亦旣戒裝
皇心載遠夕帳亭臯晨儀禁苑神行景鶩發自
靈闕對宴感分瞻秋悼晚

應詔觀北湖田收

周御窮轍迹夏載歷山川蓄軫豈明懋善遊皆
聖仙帝暉膺順動清蹕巡廣廡樓觀眺豐頴金

駕映松山飛奔互流綴緹縠代迴環神行埒浮
景爭光溢中天開冬簪徂物殘悴盈化先陽陸
團精氣陰谷曳寒煙攢素旣森藹積翠亦葱芊
息饗報嘉歲通急戒無年溫渥浹興隸和惠屬
後筵觀風久有作陳詩愧未妍疲弱謝陵遽取
累非繼牽

車駕幸京口侍遊蒜山作

元嘉二十六年也

元天高北列日觀臨東溟入河起陽峽踐華因
削成巖險去漢宇襟衛徙吳京流池自化造山

關固神營園縣極方望邑社總地靈宅道炳星
緯誕曜應辰明睿思纏故里巡駕帀舊垌陟峰
騰輦路尋雲抗瑤薨春江壯風濤蘭野茂萸英
宜遊弘下濟窮遠凝聖情嶽濱有和會祥習在
卜征周南悲昔老留滯感遺氓空食疲廊肆反
稅事巖耕

車駕幸京口三月三日侍遊曲阿後湖作

元嘉二十
六年也

虞風載帝狩夏諺頌王遊春方動宸駕望幸傾

五州山祗踞嶠路水若警滄流神御出瑤軫天
儀降藻舟萬軸亂行衛千翼汎飛浮雕雲麗璇
蓋祥飈被綵旂江南進荆豔河激獻趙謳金練
照海浦茄鼓震溟洲藐盼靑崖衍漾觀綠疇
民靈騫都野鱗翰聳淵丘德禮旣會洽川嶽徧
懷柔

拜陵廟作

周德恭明祀漢道遵允靈哀敬隆祖廟崇樹加
園塋逮事休命始投迹階王庭陪厠廻天顧朝

讌流聖情早服身義重晚達生戒輕否來王澤
竭泰往人悔形敕躬慙積素復與昌運并恩合
非漸漬榮會在逢迎夙御嚴清制朝駕守禁城
東紳入西寢伏軫出東墀衣冠終冥漠陵邑轉
葱青松風遶路急山煙冒壠生皇心憑睿物民
思被歌聲萬紀載絃吹千歲託旒旌未殊帝世
遠已同淪化萌幼壯困孤介未暮謝幽貞發軌
喪夷易歸軫懷崎嶇

贈王太常

玉水記方流璇源載圓折蓄寶每希聲雖秘猶

彰徹聆龍聯

音砌

九淵聞鳳窺丹穴歷聽豈多士

歸然觀時哲舒文廣國華敷言遠朝列

五臣作烈

德

輝灼邦懋芳風被鄉耆側同幽人居郊扉常晝
閉林間時晏開亟廻長者轍庭昏見野陰山明
望松雪靜惟淡群化徂生入窮節豫往誠歡歇
悲來非樂闕屬美謝繁翰遙懷具短札

王僧達荅顏延年附

長卿冠華陽仲連擅海陰珪璋旣文府精理

亦道心君子聳高駕塵軌實爲林崇情符遠
迹清氣溢素襟結遊畧年義篤顧棄浮沈寒
榮共偃曝春溫時獻冊聿來歲序暄輕雲出
東岑麥壟多秀色楊園流好音歡此乘日暇
忽忘逝景侵幽裒何用慰翰墨久謠吟棲鳳
難爲條淑肌非所臨誦以永周旋匪以代兼
金

夏夜呈從兄散騎車長沙

炎天方埃鬱暑晏閑塵紛獨靜闕偶坐臨堂對

星分側聽風薄木遙睇月開雲夜蟬當夏急陰
蟲先秋閒歲候初過半荃蕙登久芬屏居惻物
變慕類抱情殷九逝非空思七襄無成文

直東宮荅鄭尙書

皇居體環極設險祇天工兩闔阻通軌對禁限
清風歧予旅東館徒歌屬南墉寢興鬱無已起
觀辰漢中流雲藹青闕皓月鑒丹宮踟躕清防
密徙倚恒漏窮君子吐芳訊感物惻余衷惜無
丘園秀景行彼高松知言有誠貫美價難克竟

何以銘嘉貺言樹絲與桐

和謝監靈運

弱植慕端操窘步懼先迷寡立非擇方刻意藉
窮棲伊昔邁多幸秉筆侍兩閭雖慙丹墀施未
謂玄素朕徒遭良時詖王道奄昏噩人神幽明
絕朋好雲雨乖弔屈汀洲浦謁帝蒼山蹊倚巖
聽緒風攀林結畱蕙跂予間衡嶠曷月瞻秦稽
皇聖昭天德豐澤振沈泥惜無雀雉化何用充
海淮去國還故里幽門樹蓬藜采芡葺昔宇翦

棘開舊畦物謝時既宴年往志不偕親仁敷情

昵與玩

善作賦

究辭悽芬馥歆蘭若清越奪琳珪

豈言非報章聊用布所懷

謝靈運還舊園見顏范二中書附

辭滿豈多秩謝病不待年偶與張邴合久欲
還東山聖靈昔廻眷微尚不及宣何意衝飈
激烈火縱炎煙焚玉發崑峯餘燎遂見遷投
沙理既迫如叩願亦愆長與歡愛別永絕平
生緣浮舟千仞壑總轡萬尋巔流沫不足殫

石林豈爲艱閩中安可處日夜念歸旋事蹟
兩如直心愜三避賢託身青雲上棲巖挹飛
泉盛明盪氛昏貞休康迪遭殊方憾成貸微
物豫采甄感深操不固質弱易扳纏曾是反
昔園語往實欸然爨基卽先築故池不更穿
果木有舊行壤石無遠延雖非休憇地聊取
永日閑衛生自有經息陰謝所牽夫子照清
素探懷授徃篇

北使洛

改服飭徒旅，首路踰險難。振楫發吳洲，秣馬陵
楚山。塗出梁宋郊，道由周鄭間。前登陽城路，日
夕望三川。在昔輟期運，經始闢聖賢。伊瀝絕津
濟，臺館無尺椽。宮陛多巢穴，城闕生雲煙。王猷
升八表，嗟行方。暮年陰風振，涼野飛雲蒼。窮天
臨塗末，及引置酒慘無言。隱憫徒御悲，威遲良
馬煩。遊役去芳時，歸來屢徂讐。蓬心旣已矣，飛
薄殊亦然。

還至梁城作

眇默軌路長
憔悴征戍勤
昔邁先祖師
今來後
歸軍振策
睠東路
傾側不及群
息徒領將
夕極
望梁陳
分故國
多喬木
空城凝寒雲
丘隴填郭
郭銘誌滅
無文木石
倚幽闔
黍苗延高墳
惟彼
雅門子
吁嗟孟嘗君
愚賤同堙滅
尊貴誰獨聞
曷爲久
游客憂念坐
白殷

始安郡還都與張湘州登巴陵城樓作

江漢分楚望
衡巫奠南服
三湘淪洞庭
七澤藹
荆牧經塗延
舊軌
登闕訪川陸
水國周地險
河

山信重複却箇雲夢林前瞻京

一作荆臺

園清寒

霽岳陽曾暉薄瀾澳懷矣自遠風傷哉千里目
萬古陳徃還百代勞起伏存沒竟何人炯介在
明淑請從上世人歸來藝桑竹

五君詠五首

阮步兵

阮公雖淪跡識密鑒亦洞沈醉似埋照寓辭類
託諷長嘯若懷人越禮自驚衆物故不可論途
窮能無慟

嵇中散

中散不偶世本自餐霞人形解驗默仙吐論知
凝神立俗迂流議尋山冷隱淪鸞關有時鍛龍
性誰能馴

劉參軍

劉伶善閉關懷情滅聞見鼓鐘不足歡榮色豈
能眩韜精日沈飲誰知非荒宴頌酒雖短章深
衷自此見

阮始平

仲容青雲器實稟生民秀達音何用深識微在
金奏郭奕已心醉山公非虛覲屢薦不入官一
麾乃出守

向常侍

向秀甘淡薄深心託毫素探道好淵玄觀書鄙
章句交呂旣鴻軒攀嵇亦鳳舉流連河裏遊惻
愴山陽賦

爲織女贈牽牛

婺女儷經星姮娥棲飛月慙無二媛靈託身侍

天闕閶闔殊未暉咸池豈沐髮漢陰不夕張長
河爲誰越雖有促讌期方須涼風發虛計雙隴
周空遲三星沒非怨杼軸勞但念芳菲歇

歸鴻

昧旦濡和風霑露踐朝暉萬有皆同春鴻鴈獨
辭歸相鳴去澗汜長引發江畿皦潔登雲侶連
綿千里飛長懷河朔路緬與湘漢違

除弟服

徂沒離二秋掩泣備三冬往辰緬難紀來筭忽

易窮升沒淹基晦澁掃易禮容縞衣變余體長
逝歸爾躬

辭難潮溝

徘徊眷郊甸俛仰引單襟一塗苟不豫百慮畢
來侵永懷交在昔有願誓瑟琴寫言勞者事將
用慰亡簪

侍東耕詩

提封經地域辰角麗天節浮靄起青壇沈腴發
糾耜草服薦同穗黃冠獻嘉壽

闕

顏光祿集

卷一

三

發景陽樓

詩彙作
袁淑非

風觀要春景月榭迎秋光
汾波被華若隨山茂

貞芳

顏光祿集卷之二

宋琅琊顏延之延年著

明蜀漳張 燮紹和纂

詔

追贈袁淑詔

夫輕道重義亟聞其教世敝國危希遇其人自
非達義之至識正之深者孰能抗心衛主遺身
固節者哉故太子左衛率淑文辯優洽秉尙貞
懋當要逼之切意色不撓厲辭道逆氣震匈黨

虐亦交至取斃不移古之懷忠隕難未云出其
右者興言嗟悼無廢乎心宜在加禮永旌宋有
臣焉可贈侍中太尉諡曰忠憲公

表

謝子竣封建城侯表

伏見策書降錫，息竣開國建城縣侯，爵踰三等，
戶越兼千生，邀洪禮，身茂盛世，闔宗革聽，盡室
改觀，誠慙末品，誤參其泰。臣聞子之能仕，父教
之忠，忠教善信，臣實負其前誥，能仕志政，竣固
暗於明試，徒以數遇，會昌消憂，啓聖幸與，靈祚
福德，共從義勲，分賞執珪，登朝析金，受邑慶重，
慮愆恩往，懼積非臣，耄蔽所任，圖報豈竣庸薄。

顏光祿集

卷二

二

所能奉服

自陳表

臣聞行百里者半於九十言其末路之難也愚
心常謂爲虛方今乃知其信臣延之人薄寵厚
宿塵國言而雪効無從榮牒增廣曆盡身彫日
叨官次雖容載有塗而妨穢滋積早欲啓請餘
筭屏蔽醜老但時制行及歸慕無賒是以懼冒
愆非簡息干黷耗歛難支質用有限自去夏侵
暑入此秋變頭齒眩疼根痼漸劇手足冷痺左
脾尤甚素不能食頃向減半本猶賴服此倦憊

晚年疾所催顧景引日臣班叨首卿位尸封典
肅祇朝校尙惡匪任而陵廟衆事有以疾怠宮
府覲慰轉闕躬親息奠庸微過竽近世回澤爰
降寶加將監乞解所職隨就藥養伏願聖慈特
垂矜許稟恩明世負報冥暮仰企端闈上戀罔
極

請立渾天儀表

張衡創物蔡邕造論我憂相襲世重其術臣昔
奉使入關值大軍旋旆渾儀在路肆觀奇秘絕
代異寶旋及王府考諸前志誠應夙聞尙書璇
璣玉衡以齊七政崔瑗所謂數術窮天地制作
倖造化經志所云圖憲所本故體度不渝精測
尙矣則七晷運變無匪康時九代貞觀不絕司
曆臣夙懷末意懼干非任今忝惟職統敢昧死
以聞

爲齊竟陵王世子臨會稽表

此郡歌風蹈雅旣髣髴於淹中春誦夏絃實依
櫛於河上頃者以來稍有訛替可推擇明經式
寄儒職使琢玉成器無爽昔談鑄金待價有符
舊說

拜永嘉太守辭東宮表

抗志絕操
毫陸謝芻代
食賓土何獨
匪民

書

釋何衡陽達性論書

前得所論深見弘慮崇致人道黜遠生類物有
明微事不愆義維情輔教足使異門掃軌况在
蘄同豈忘所附徒恐琴瑟專一更失闡諧故畧
廣數條取盡後報足下云同體二儀共成三才
者是必合德之稱非遭人之目然總庶類同號
衆生亦含識之名豈上哲之謚然則議三才者
無取於氓隸言衆生者亦何濫於聖智雖情在

序別自不患亂倫若能兩籍方教俱舉達義節
彼離文採此其實則可便倍害自和析符復合
何詎怏怏執呂以毀律且大德曰生有萬之所
同同於所方萬豈得生之可異不異之生宜其
爲衆但衆品之中愚慧群差人則役物以爲養
物則見役以養人雖始或因順終至裁殘庶端
萌起情嗜不禁生害繁慘天理鬱滅皇聖哀其
若此而不能頓奪所滯故設候物之教謹順時
之經將以開仁育識反漸息泰耳與道爲心者

或不劑此而止又知大制生死同之榮落類諸
區有誠亦宜然然神理存沒儻異於枯菱變謝
就同草木便當煙盡而復云三后升遐精靈在
天若精靈必在果異於草木則受形之論無乃
更資來說將由三后粹善報在生天邪欲毀後
生反立升遐當毀更立固知非力所除若徒有
精靈尙無體狀未知在天當何憑以立吾怯於
庭斷故務求依倣而進遐思索未獲所安凡氣
數之內無不感對施報之道必然之符言其必

符何猜有望故遺惠者無要在功者有期期存
未善去惠乃至人有賢否則意有公私不可見
物或期報因謂樹德皆要且經世恒談貴施者
勿憶士子服義猶惠而弗有况在聞道要更不
得虛心而動必懷嗜事盡憚權邪曾不能引之
上濟每驅之下淪雖深誚校責亦已厚言不代
足下嬰城素堅難爲飛書而吾自居憂患情理
無託近辱褒告欲其布意裁往釋慮不或值顏
延之白

何承天荅顏永嘉附

敬覽芳訊研復淵旨區別三才步驗精粹宣
演道心褒賞施士貫綜幽明推誠及物行之
於已則美敷之於教則弘殆無所聞遐尋嘉
誨之來將欲令參觀斗極復迷反逕思或昧
然冰全曉洽故復重仰本懷足下所謂共成
三才者是必合德之稱上哲之人亦何爲其
然夫立人之道取諸仁義惻隱爲仁者之表
耻惡爲義心之端牛山之木剪性於鑿斧情

漠之想汨慮於利害誠宜滋其萌蘖援其善
心遂乃存而不筭得無過與又云議三才者
無取於氓隸言衆生者亦何濫於聖智旣已
聞命猶未知二塗當以何爲判將伊顏下麗
寧喬札上附企望不倦以祛未了必令兩籍
俱舉宮和符合豈不盡善又曰大德曰生有
萬之所同同於所方萬豈得生之可異非謂
不然人生雖均被大德不可謂之衆生譬聖
人雖同稟五常不可謂之衆人奚取於不異

之生必宜爲衆哉來告云人則役物以爲養
物則見役以養人大判如此便是顧同鄙議
至於情嗜不禁害生慘物所謂甚者泰者聖
人固已去之又云以道爲心者或不劑此而
止請問不止者將自己不殺邪令受教咸同
邪若自己不殺取足市鄽故是遠庖廚意必
欲推之於編戶吾見雅論之不可立矣又云
若同草木便當煙盡精靈在天將何憑以立
夫神魄惚恍游魂爲變發揚悽愴亦于何不

之伸由福於知死賜也失於所問不更受形
前論之所明言所遇之方請附夫子之對及
施報之道必然之符當謂于氏高門侯積善
之慶轉陽不伐膺公侯之祚何關於後身乎
又云經世恒談施者勿憶士子服義惠而弗
有誠哉斯言微恨設報以要惠說徒之所先
悅報而爲惠舉世之常務疑經受累劫之罪
勤施獲積倍之報不似吾黨之爲道者是以
怏怏耳知欲引之上濟亦甚所不惜但丈夫

處實者頗陋前識之華故不爲也若乃施非
周急惠存功譽揆諸高明亦有恥乎此吾寧
其恒心久而不化內慙璩子未暇有所謂也
何承天白

重釋何衡陽書

薄從歲事躬斂山田田家節隙野老爲儔言止
穀稼務盡耕牧談年計猶無聞達義重獲微辨
得用招慰啓告精至愈慙固結今復妄書往懷
以輪未述夫籍意探理不若析之聖文三才之
論故當本諸三畫三畫旣陳中稱君德所以神
致太上崇一元首故前謂自非體合天地無以
元應斯弘知研其清慮未肯存同猶以兼容罔
棄廣載不遺篤物之志誠爲優贍恐理位雜越

疑陽遂衆若惻隱所發窮博愛之量耻惡所加
盡祐直之正則上仁上義吾無間然但情之者
寡利之者衆預有其分而未臻其極者不得以
配擬二儀耳今方使極者爲師不極者爲資扶
其敬讓去其忤爭令鑒斧鑄刀利害寢端驅百
代之民出信厚之塗則何萌不滋何善不援而
誣以不筭未值其意三才等列不得取偏才之
器衆生爲號不可濫無生之人故此去氓隸彼
甄聖智兩籍俱舉旨在於斯若喬札未能道一

皇王豈獲上附伊顏猶共賴氣化宜乎下麗二塗之判易於蹟指又知以人生雖均被大德不可謂之衆生譬聖人雖同稟五常不可謂之衆人夫不可謂之衆人以茂人者神明也今已均被同衆復何諱衆同故當殊其特靈不應異其得生從忌衆名未虧衆實得無似蜀梁逃畏卒不能避所謂役物爲養見役養人者欲言愚慧相傾憖等相制事由智出作非天理是以始矜萌起終哀鬱滅豈與足下芻豢百品共其指歸

凡動而益流下民之性化而裁之上聖之功謹
爲垣防猶患踰盜况乃罔不備設以克侈志方
開所泰何議去甚故知慘物之談不得與薄夫
同憂樂殺意偏好生情博所云與道爲心者博
乎生情將使排虛率遂跖實莫反利澤通天而
不爲惠庸適恩止麝卵事法豺獾邪推此往也
非惟自己不復委咎市廛乎庖廚且市庖之外
非無御養神農所書中散所述公理美其事仲
彥精其業是亦古有其傳今聞其人何必以割

剝爲稟和之性爛湔爲糞善之具哉若以編戶
難齊憂鄙論未立是見二叔不咸慮周德先立
儻能伸以遠圖要之長世則日計可滿歲功可
期精靈草木果已區別遊魂之荅亦精靈之說
若雖有無形天下寧有無形之有顧此惟疑宜
見正定仲尼不荅有無未辨足下旣辨其有豈
得同不辨之荅雖子嗜學懼未獲所附或是曉
晦塗隔隱著事懸遂令明月廢照世智限心知
謂必符之言體之極于罔講求反意如非相盡

或世人守璞受讓玉市將譯胥牽俗還說國情
苟未照盡請復具仲近釋報施首稱氣數者以
爲物無妄然各以類感感類之中人心爲大心
術之動隸歷所不能得及其積致于可勝原而
當斷取世見據爲高證莊周云芥鹵滅裂報亦
如之孫卿日報應之勢各以類至後身著戒可
不敬與慈護之人深見此數故正言其本非邀
其末長美過惡反民大順濟有生之類入無死
之地今慶周兆物尊冠百神安宜祚極子胤福

限卿相而已常善以救善亦從之勢猶影表不
慮自來何言乎要惠悅報疑罪勤施似由近驗
吝情遠猜德教故方罰矜功而濫咎忘賢遺存
異義公私殊意已備前白若不重云想處實陋
華者復見其居厚去薄耳若施非周急惠而期
譽乃如之人誠道之蠹惟子之耻丘亦耻之

何承天重荅顏永嘉附

吾少信管見老而彌篤旣言之難云將湮腐
方寸故願憑流颺以托鱗融厚故意垂懷惠

以重釋稽證周明華辭博瞻夫良玉時玷賤
夫指其瑕望舒抱魄野人睨其缺豈伊好辨
未獲云已復進請益之間庶以研盡所滯來
告云三才之論故當本諸三畫三畫旣陳申
稱君德所以神致太上崇一元首若如論旨
以三畫爲三才則初擬地爻三議天位然而
遯世無悶非厚載之目君子乾乾非蒼蒼之
稱果兩儀罔託亦何取於立人但爻在中和
宜應蓄德耳又云惻隱窮博愛之量耻惡盡

祐直之方則爲上仁上義便是計體仁義者
爲三才尋又云僑札未獲上附伊顏宜其下
麗則黃裳之人其猶弗及雖贖之旨高下無
准故惑者未悟也夫陰陽陶氣剛柔賦性圓
首方足容貌匪殊惻隱耻惡悠悠皆是但參
體二儀必舉仁義爲端取知欲限以名器慎
其所假遂令惠人潔士比性於毛群庶幾之
賢同氣於介族立象之意豈其然哉又云已
均被同衆復何諱衆同故當殊其特靈不應

異其得生夫特靈之神旣異於衆得生之理
何嘗暫同生本於理而理異焉同衆之生名
將安附若執此生名必使從衆則混成之物
亦將在例邪又云謹爲垣防猶患踰盜況乃
罔不設備以克侈志方開所泰何議去甚足
下始云皇聖設候物之教謹順時之經將以
反漸息泰今復以方開所泰爲難未詳此將
難鄙議將譏聖人也又云市庖之外豈無御
養神農所書中散所述何必封剡爲稟和燭

淪爲異善人禮瘞蒲粟宗社三牲麋腳豆俎
以供賓客七十之老俟肉而飽豈得惟陳列
草石取備上藥而已吾所憂不立者非謂洪
論難持邇嫌此事不可頓去於世耳又云天
下寧有無形之有顧此惟疑宜見正定尋來
昔似不嫌有鬼當謂鬼宜有質得無惑天竺
之書說鬼別爲生類故邪昔人以鬼神爲教
乃列于典經布在方策鄭僑吳札亦以爲然
是以雲和六變實降天神龍門九成入鬼臧

格足下雅秉周禮近忽此義方詰無形之有
爲支離之辨乎又云後身著戒可不敬與慈
護之人深見此數未詳所謂慈護者誰氏之
子若據外書報應之說皆吾所謂權教者耳
凡講求至理曾不折以聖言多採譎怪以相
扶翼得無似以水濟水邪又云物無妄然必
以類感常善以救善亦從之勢猶影表不慮
自來斯言果然則類感之物輕重必侔影表
之勢脩短有度致飾土木不發慈愍之心順

時蒐狩未根慘虐之性天宮華樂焉賞而上
升地獄幽苦奚罰而淪陷唱言窮軒輊立法
無衡石一至於此且阿保傳愛慎及溷腴良
庖提刀情怵介族彼聖人者明竝日月化關
三統若令報應必符亦何妨於教而緘局義
唐之紀埋閉周孔之世肇結網罟興累億之
罪仍制牲牢開長夜之罰遺彼天厨甘此芻
豢曾無拯溺之仁橫成納隍之酷其爲不然
宜簡淵慮若謂窮神之智猶有所不盡雖高

情愛竒想亦未至於侮聖也足下論仁義則云情之者少利之者多言施惠則許其遺賢忘報在情旣少孰能遺賢利之者多曷云忘報若能推樂施之士以期欲仁之疇演忘報之意引向義之心則義寔在斯求仁不遠至於濟有生之類入無死之地慶周兆物尊冠百神斯旨宏誕非本論所及無乃秦師將遁行人言肆乎豈其相迫居吾語子聖人在上不與百神爭長有始有卒焉得無死之地夫

辨章幽明研精庶物反初結繩終繁文敘性
以道率故絕親譽之名範圍造化無傷博愛
之量以畋以漁養兼賢鄙三品之獲實克賓
庖金石發華笙簫協節醉酒飽德介茲萬年
處者弘日新之業仕者敷先王之教誠著明
君澤被萬物龍章表觀鳴玉節趨斯亦堯孔
之樂地也及其不遇考槃阿澗以善其身殺
雞爲黍聊寄懷抱或負鼎割烹揚隆名於長
世或屠羊鼓刀陵高志於浮雲此又君子之

處心也何必陋積善之延祚希無驗於來世
生背當年之真懽徒疲役而靡歸繫風捕影
非中庸之美慕夷眩妖違通人之致蹲膜揖
讓終不竝立竊願吾子捨兼而遵一也及蜀
梁二叔甘人譚胥之碑非本義所繼故不復
具云